

दिनांक 09.06.2025
समय: 18.45 बजे

आकाशवाणी जयपुर-अजमेर प्रादेशिक समाचार

- प्रधानमंत्री नरेन्द्र मोदी केन्द्र मांय एनडीए रा राज रा 11 साल पूरा व्हेवण रे मौके कह्यो— सरकार जनता री उम्मीदां ने नुवी उड़ान दीनी।
- मुख्यमंत्री भजनलाल शर्मा पाणी बचावण ने जनता रो आन्दोलन बणावण माथे ज़ोर दीनो।
- प्रदेश मांय केई ठोडां लू रा हालात— 11 जून तांई ज़बरदस्त गर्मी रो कोप रेहवण रा आसार।
- राज्य मांय नुवी ग्राम सेवा सहकारी समितियां बणावण सारू तैय मापदंडां मांय छूट दी जावेला।

प्रधानमंत्री नरेन्द्र मोदी कह्यो है के लारला दस साल मांय सरकार जनता री उम्मीदां ने नुवी उड़ान दीनी है। केन्द्र मांय एनडीए सरकार रा 11 साल अर प्रधानमंत्री रा तौर ऊं श्री मोदी रा तीजा कार्यकाल री पहली वर्षगांठ रे मौके आज सोशल मीडिया पोस्ट मांय वे देश री विकास यात्रा मांय भेळी कामयाबी माथे नाज़ जतायो। ई मौके भारतीय जनता पार्टी आज पूरा देश मांय जनसम्पर्क अभियान सुरू कीनो। **संकल्प से सिद्धि** प्रचार अभियान रा तैत जनता सागे बातचीत कर र वां ने सरकार री उपलब्धियां री जाणकारी दी जा रही है। केंद्रीय मंत्री अर भारतीय जनता पार्टी रा राष्ट्रीय अध्यक्ष जगत प्रकाश नड्डा प्रधानमंत्री नरेन्द्र मोदी री अगुवाई वाली सरकार ने भ्रष्टाचार मुक्त अर जवाबदेह शासन

देवण वाळी बतायी। वे कह्यो के सरकार देश री सियासी संस्कृति ने बदल दीनी। मोदी सरकार रा 11 साल पूरा व्हेवण रे मौके नई दिल्ली मांय खबरनवीसां सागे बातचीत करता थकां श्री नड्डा कह्यो के ई दौरान साफगोई रो नुवो मानक बणायी ज्यो।

भाजपा रा अध्यक्ष कह्यो के लारला दस साल मांय सरकार अनुसूचित जाति, जनजाति अर अन्य पिछड़ा वर्ग समेत समाज रा सगळा तबकां सारू काम कीनो है। श्री नड्डा कह्यो के सरकार महिलावां माथे खास ध्यान देता थकां विकास ने बधावो दीनो है।

प्रधानमंत्री नरेन्द्र मोदी सगळां ऊं **नमो एप** माथे भारत री लारला 11 साल री विकास यात्रा ऊं जुड़्या सर्वे मांय शिरकत करण री अरज कीनी है। सोशल मीडिया पोस्ट मांय श्री मोदी एक पोर्टल रो लिंक ई साझा कीनो, जिण रे मार्फत कोई ई जन मन सर्वेक्षण मांय शिरकत कर सके है।

मुख्यमंत्री भजनलाल शर्मा पाणी बचावण ने जनता रो आंदोलन बणावण माथे जोर दीनो है। वे आज पुष्कर मेला मैदान मांय राख्यी ज्यी जनसभा मांय बोल रह्या हा। श्री शर्मा कह्यो के पाणी री ठौड़ और कोई चीज काम नी आ सके है अर पाणी है तो ही काल है। वे कह्यो के जनता री मदद रे बगैर कोई ई अभियान कामयाब नी व्हे सके है। मुख्यमंत्री पाणी बचावण री मुहिम ने खास बताता थकां जनता ऊं इण मांय भागीदारी री अपील कीनी। वे कह्यो के प्रवासी राजस्थानियां री मदद ऊं प्रदेश मांय आवता चार साल मांय पाणी बचावण री 45 हजार संरचनावां बणायी जावेला।

मुख्यमंत्री ब्रह्मलोक कॉरिडोर बणावण रो ऐलाण करता थकां कह्यो के ई रा तैत पुष्कर रा घाटां ने और बेहतर बणाया जावेला। श्री शर्मा ब्रह्मा मिन्दर मांय जनता री मदद ऊं लगायी ज्यी लिफ्ट रो ई उद्घाटन कीनो। मुख्यमंत्री विधानसभा

अध्यक्ष वासुदेव देवनानी अर मंत्री सुरेश सिंह रावत सागे पौधा रोप र हरियाळो राजस्थान रो संदेश दीनो। ई पाछे श्री शर्मा ब्यावर जिला रा जवाजा मांय जल संचय—जन भागीदारी री अपील दोहराई। इण ऊं पैली मुख्यमंत्री आज जयपुर मांय जनसुणवाई कीनी। वां रा रेहवास माथे जनसुणवाई रे दौरान श्री शर्मा अहलकारां ने जनता री परेशानियां रा बेगा निपटारा रा हुकम दीना। मुख्यमंत्री जिला कलेक्टरां ने नियमित तौर ऊं जनसुणवाई करण बाबत कह्यो।

लोकसभा अध्यक्ष ओम बिरला जोधपुर रा आईआईटी मांय आज लैक्चर हॉल कॉम्प्लेक्स रो उद्घाटन कीनो अर रिसर्च इनिशिएटिव ग्रांट बांटी। श्री बिरला आईआईटी जोधपुर री नुवी वेबसाइट री ई सरूआत कीनी। ई मौके श्री बिरला आई.आई.टी. री सराहवणा करता थकां कह्यो के आई.आई.टी. तकनीक अर नवाचारां रा हलका मांय देश ने आगे बधायो है। श्री बिडला कह्यो के आवता बगत मांय ओ संस्थान आला दर्जा री भणार्ई—लिखाई, नवाचार अर विज्ञान रा हलका मांय नुवा आयाम बणावेला।

प्रदेश मांय नगरीय निकायां अर पंचायतीराज संस्थावां रा उपचुनाव मांय भारतीय जनता पार्टी जीत हासिल कीनी है। पार्टी 36 मांय ऊं 27 सीटां माथे जीती, जद के एक जगह भाजपा री हिमायत वाळो उम्मीदवार जीत्यो। प्रदेश भाजपा अध्यक्ष मदन राठौड़ जीतण वाळा सगळा उम्मीदवारां ने बधार्ई देता थकां वां री जीत ने कार्यकर्तावां री जीत बतायी।

प्रदेश मांय केई ठोडां लू रा हालात बण्योड़ा है। मौसम विभाग रे मुजब 11 जून तांई राज्य मांय न्यारी—न्यारी ठोडां ज़बरदस्त गर्मी अर लू रा हालात रेहवण रा आसार है। लारला चौबीस घंटां मांय बीकानेर, चूरू, हनुमानगढ़ अर श्रीगंगानगर मांय बत्तो ऊं बत्तो तापमान 47 डिग्री सेल्सियस ने पार कर ग्यो। झालावाड़, चूरू, कोटपूतली—बहरोड़ अर भरतपुर समेत केई ठोडां आज ई जोरदार गर्मी रही।

बांसवाड़ा रा माही बांध हलका मांय आज नाव पलट जावण ऊं एक ही पिरवार रा तीन जणां री मौत व्हे गयी। ज़िला रा खेरवाड़ा हलका रा लराठी गांव मांय ई काल सिंज्यां सोम नदी मांय डूब जावण ऊं एक ही पिरवार रा तीन बच्चां री मौत व्हे गयी। अ बच्चा भैंस ने हेरता थकां नदी कने पूग गया जठे गहरा पाणी मांय उतर जावण पछे डूब गया। गांव रा सरपंच लालूराम मीणा बतायो के सोम नदी माथे पुल बणावण री केई दफ़ा मांग करी ज्यी है।

.....

सवाईमाधोपुर रा रणथम्भौर किला मांय आज तड़के बाघ रा हमला रे कारण एक जणा री मौत व्हे गयी। रणथम्भौर टाइगर रिज़र्व रा सी.सी.एफ. अनूप के.आर. बतायो के मरण वाळो किला रा जैन मिन्दर मांय लारला बीस साल ऊं चौकीदार रा तौर ऊं काम कर रह्यो हो। ध्यानजोग है के लारला दो महीनां मांय बाघ रा हमला रे कारण ई हलका मांय तीजी मौत व्ही है। वे बतायो के बाघ री आवण—जावण रे कारण काल ऊं ही किला मांय जातरूआं री आवाजाही रोक दीरीजी ही। वाकया पाछे गांव वाळा सवाईमाधोपुर—कुंडेरा गेलो जाम कर दीनो। वे मरण वाळा रा पिरवार वाळां ने मुआवज़ो देवण अर बाघ री आवण—जावण ने ध्यान राखता थकां हिफ़ाज़ती इंतजामात बधावण री मांग कीनी है।

.....

प्रदेश मांय नुवी ग्राम सेवा सहकारी समितियां बणावण सारू तैय मापदंडां मांय छूट दी जावेला। नुवी सहकारी समितियां सारू अब सदस्यां री कम ती कम तादाद डोढ़ सौ व्हेवणो ज़रूरी है। सहकारिता विभाग री प्रमुख शासन सचिव मंजू राजपाल आ जाणकारी दीनी। राजपाल बतायो के कम जनसंख्या घनत्व वाळा ज़िलां मांय सहकारी समितियां बणावण सारू शर्तां मांय और छूटी दी जा सके है। वे आज नुवी ग्राम सेवा सहकारी समितियां बणावण रा बारा मांय जयपुर ऊं वीडियो कॉन्फ्रेंसिंग रे मार्फत राख्यी ज्यी मीटिंग मांय बोल रही ही। राजपाल बतायो के एक अप्रैल पाछे राज्य मांय 118 नुवी ग्राम सेवा सहकारी समितियां बणायी जा चुकी है।

.....

देश मांय चाल रह्या विकसित कृषि संकल्प अभियान रे मार्फत मोटा पैमाना माथे किसानां मांय जाग जगायी जा रही है। ई रा तैत किसानां ने खेती—बाड़ी री

नुवी तकनीक, नवाचारां, बीजां री बेहतर किस्मां, न्यारी—न्यारी योजनावां, पाणी रो प्रबंध, जैविक खेती अर बाज़ार सम्पर्क रा बारा मांय जाणकारी दी जा रही है। अभियान रा तैत प्रगतिशील किसान वां रा अनुभव बता रह्या है। डीग ज़िला मांय इन्द्रौली गांव रा प्रगतिशील किसान सांवलिया राम मीणा वां रा भीडूआं ने कुदरती अर दवाइयां रा गुणां वाळा पौधां री खेती रा बारा मांय जाणकारी दीनी। सांवलिया राम बतायो के वे रासायनिक खाद काम लियां बगैर चोखी किस्म वाळा गेहूं री उपज ले रह्या है।

.....

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलाई जा रही है। बाड़मेर रा योगाचार्य महिपाल कमेड़िया री सोच है के योग इन्सान ने स्वस्थ राखण मांय मदद करे है।

.....